

Theses Iuridicæ,
EX MATERIA
DE REGALIBVS COLLECTAE:

Q V A S

*DIVINA AVXILIANTE GRATIA
CONSENTIENTIBVS ITEM AMPLISSIMIS Iu-
ridicæ facultatis Decano, cæterisq; Professoribus,
in celeberrima & Catholica Ingolstadiensi Aca-
demia publicè disputandas atque defen-
dendas suscepit*

ILLVSTRIS ET GENE-
ROSVS DOMINVS, D. FERDINANDVS
KHVENA BELASI, in Liechtenbetg & Garte-
nau, Baro in Nouo Lempach, &c.

P R Æ S I D E

MAGNIFICO ET EXCELLENTISSIMO I. C. D.
NICOLAO EVERHARDO CANONVM P. R. O-
fessore Ordinario, & Illustrissimi Bauaria
Ducis Consiliario.

Disputabuntur in Auditorio Canonistarum
Die 3. Februarij.




INGOLSTADII,

Excusæ per DAVIDEM SARTORIVM. Anno

M. D. LXXXIII.

Dno Praefecti Illustris ac generosi Inq. Inq.
Plauen.



REVERENDISSIMO

IN CHRISTO PATRI, ILLVSTRISSI-
moque Principi ac Domino, Domino IOANNI IACO-
BO ARCHIEPISCOPO SALISBURGENSI, & S.

Apostolicæ Sedis Legato, Domino & PA-

TRVO suo clementissimo.

REVERENDISSIMO QVO-

QUE IN CHRISTO PATRI AC DOMINO, D.

GEORGIO A KHIENBURG, confirmato COAD-

IUTORI, & designato eiusdem Archiepiscopalis

Ecclesiæ Successori, Praposito & Archidiao-

no, &c. Domino suo multis nomini-

bus colendissimo.

REVERENDIS ITEM, GENEROSIS, ET

NOBILIBVS DOMINO DECANO ET SENIORI, TO-

rique venerabili Capitulo dictæ Metropolitanæ Ecclesiæ Sa-
lisburgensis, Dominis suis gratiosis & obseruandis. S. P.



X EO TEMPORE

quo Patria discedens

Ingolstadium veni, Re-

uerendissime & Illu-

strissime Princeps, Re-

uerendissime Domi-

ne Coadiutor, Reuerendi, Generosi, No-

bilesq; viri, Domini mei Clementissimi,

A 2

Colen-

Colendissimi, Gratosi & Obseruandi,
illud mihi summa semper vi & ope eni-
tendum atq; elaborandum duxi, vt ani-
mum meum hisce præsertim imbuerem
scientiis ac disciplinis, quibus Rempu-
blicam olim iuuare, Patriæ, Parentibus
atq; amicis solatium & ornamentum a-
liquod nō exiguum afferre possem. Nul-
la enim alia re Illustris. Cels.^{nis} Amplissi-
marumq; DD. VV^{rum}, de me conce-
ptæ expectationi me cumulatus satisfac-
cere posse, quàm hac sola, existimaui: Et
meo quidem iudicio non sine maxima
causâ. Nam quotus quisq; est, vel medio-
cri præditus intelligentia, qui non perspi-
ciat, quam vehementer in nobilibus præ-
cipuè viris desideretur, multarum præ-
clarissimarumq; & Romani potissi-
mum Iuriscognitio. Quæ si historiarum
multa lectione atque memoria iuuetur,
dici vix potest quantum prudētiæ, quan-
tum animi, quantum opinionis atque
autoritatis ad retinendum in officio ho-
mines,

mines, ad tractanda Reipublicæ negotia,
ad belli ac pacis tempora moderanda,
conciliet illi viro, in quo cum splendo-
re nominis ac familiæ, cum spiritu gen-
roso, manuque prompta, hæc simul con-
currunt.

Huic autem meo summo deside-
rio & præclaro conatui feliciter incho-
ando, summa quoque opportunitas ob-
lata fuit, autoritate & consilio Ill^æ. Cels.
Amplissimarumq; DD. VV^{rum}, quarum
suasu effectum est, vt ad hanc celeberrimam
& Catholicam Ingolstadiensem
Academiam studiorum causa ablegarer.
Verè autem dico, summam mihi ad stu-
dia mea opportunitatē hoc in loco fuisse
oblatam. Etenim hîc mihi videre &
audire contigit, insignes vitæ integritate
& doctrina Theologos, Iurisconsultos
excellētissimos, Medicos peritissimos,
Philosophos acutissimos, Oratores
eloquentissimos, Historicos infinita
rerum cognitione variaque lectione

præstantissimos, Poëtas eximios, & linguarum omniū Professores doctissimos. Hic videre & audire licuit, tam insignes viros in omni facultate ac scientia, non tantum publicè docentes, verum etiam disputantes, ac de rebus grauissimis, quotiescunque in actu aliquo publico, aliæue celebritate sese offerebat occasio, disertissimè perorantes. Hic videre licuit, tam præstantes eruditione viros, tum pietate erga Deum, tum mutuis inter se beneuolentiæ officiis sic certantes, vt si aliud nihil agerent, exemplo saltem suo iuuenes docere, ac ad res optimas instituere atque incitare viderentur.

Quæ omnia (Licet ego post Dei Opt. Max. veræque & Catholicæ pietatis curam, historiarum & Oratoriæ, cum Iuris Romani scientia coniuncta studia, mihi præcipuè proposita habuerim) non potuerunt me non maximo-perè delectare, tum ob mirificam rerum
in

in publico propositarū varietatem, quæ ipsa per se animum audiētis recreat, tum etiam propterea, quod in singulis animaduerti potuit, quanto quisque studio, quanta industria, quantoque conatu in exornanda & excolenda facultate sua laboraret atque eniteretur.

Sanè quod ad mea, quæ mihi præcipua fuisse dixi, Iuris Romani studia attinet, eos hîc viros ac Præceptores sum nactus, qui me in his non tantum publicè docendo, sed etiam priuatim instruendo fidelissimè instituerunt. Quorum diligentia & studio id pariter effectum est, vt aliquoties in publicis disputationibus opponendi, demum etiam in Practico illo Iuris Consistorio ante nonnullos annos hîc instituto me exercendi, in Auditorio Papiniani honestissimus locus mihi datus fuerit. Quibus & alia felicitas accessit, quod nimirum ad intercessionem Magnifici & Nobilis viri Domini Christophori Elsenhameri in Hamersperg,

mersperg, Iuris vtriusque Doctoris &
Ill^{mi}. Bauariæ Ducis Consiliarij secretio-
ris & Cancellarij dignissimi, recipi me
contigit in conuietum Excellentissimi
Iurisconsulti, D. Nicolai Euerhardi, cu-
ius familiari & quotidiana consuetudi-
ne per quinquennium integrum ita sum
v^{su}, vt ego illum quasi alterum parētem
colerem, ipseque me vicissim vti filium
diligere. Huius autem viri paterna cura
& sollicitudine quantum ad iumēti stu-
diis meis, atque adeò totius vitæ meæ ra-
tioni allatum sit, tempus aliquando ma-
nifestabit. Neque enim ipse pateretur si
ea de re prolixam laudationem hīc in-
stituere vellem. Hoc ergo vel vnicum
modo sufficiat, quod in manibus ac præ
oculis hīc iacet, Theses nimirum istæ Iu-
ridicæ, ex pulcherrima de Regalibus Sum-
mi Principis materia depromptæ, quas
vt priusquam ex hac Academia in Italiam
proficiscerer priuato studio colligerem,
& publicè demùm sub suo Præsidio ad
dispu.

disputandum proponerem, ipse mihi auctor, suafor, & adiutor extitit.

Cum igitur iam tempus instaret, vt Theses istæ publicarētur, statim animum meum subiit memoria summæ gratiæ, beneuolentiæ, & beneficiorum ab Illust. Cels. & Amplissimis DD. VV. mihi sæpius exhibitorum. Quare vt meam vicissim erga Illust. Cels. Amplissimasque DD. VV^{as}. testarer gratitudinem ac bene merendi studium, volui vt eadem Theses sub Patrocinio & Clientela Illust. Cels. Amplissimarumque DD. VV^{rum}. in lucem prodirent. Quas proinde Ill^{re}. Cels. Amplissimisque DD. VV. sub huius noui anni initium Strenæ loco transmitto, humiliter & enixè petens, vt Illust. Cels. Amplissimæque DD. VV. hoc quicquid est exigui laboris, benignè & gratiosè suscipere, meque in posterum, (vti hætenus fecerunt) sua gratia, fauore, & amore complecti dignentur.

B

Feli-

Felicissimè valeant Illust. Cels. Amplif-
simæque DD. VV. quibus me humi-
limè ac studiosissimè commendo. In-
golstadij ipfis Calendis Ianuarij. Anno
M. D. LXXXIIII.

Illust. Cels.

Amplissimarumque
DD. Vestrarum

*Humilimus ac
Studiosiss.*

Ferdinandus Khuen
à Belasi, Baro in
Nouo Lempach.

VERBA TEXTVS TI-
TVLI LVI. QVÆ SINT RE-
galia. In vsibus Feudorum.

REGALIÆ, ARMAN-
dia, via publica, flumina naui-
gabilia, & ex quibus fiunt na-
uigabilia, portus, ripatica, ve-
tigalia, quæ vulgò dicuntur telonia, mo-
neta, multarum pœnarumque compendia,
bona vacantia, & quæ ut ab indignis le-
gibus auferuntur, nisi quæ specialiter qui-
busdam conceduntur; & bona contrahen-
tium incestas nuptias, condemnatorum, &
proscriptorum, secundum quod in nouis cõ-
stitutionibus cauetur: angariarum, paran-
gariarum, & plaustrorum, & nauium præ-
stationes, & extraordinaria collatio ad fe-
licissimam Regalis numinis expeditionem:

potestas constituendorum Magistratum,
ad iustitiam expediendam: argentaria, &
palatia in ciuitatibus consuetis, piscatio-
num redditus, & salinarum, & bona commit-
tentium crimen Maiestatis, & dimidium
thesauri in loco Caesaris inuenti non da-
ta opera, vel loco religioso: si
data operatotum ad e-
um pertineat.



THESES

THESES EX MATERIA DE REGALIBVS COLLECTÆ

I.

QVM INTER CÆTERA Iura, quæ ad conseruandum Reipub. statum, eiusdemq; onera subleuanda spectant, non minimum imò principem quasi locum obtineat Ius Regalium, eò quòd circa res maximi momenti versetur, neminem credimus dubitaturum, quin hæc de Regalibus materia dignissima sit, quæ publicè ad disputandum proponatur.

C A P. I.

DE REGALIBVS IN GENERE, quæ, & cuius illa sint, & unde originem traxerint.

II.

REGALIA SIVE REGALI-um nomen multiplex est, & varia passim significat. Quãdoq; enim hoc nomine

mine comprehenduntur feuda omnia, Imperatoris seu Regis beneficio concessa. Quandoque solum feuda Regalia maiora, cuiusmodi sunt Ducatus, Comitatus, Marchia. Interdum Ecclesiastica duntaxat maiora & primaria beneficia, qualia sunt Archiepiscopatus, Episcopatus, Abbatia, & similes Prælaturæ, huius nominis appellatione veniunt, propterea quod olim solius Regis concessione ac munere conferebantur. Interdum hoc nomine significatur Ius ipsum atque auctoritas, Regalia feuda, beneficia, cæteraque Iura fiscalia, conferendi. Denique etiam Regalium vocabulo significantur insignia, & ornamenta Imperatoriæ siue Regiæ inaugurationis, qualia sunt Corona, Sceptrum, Regia indumenta, Globus aureus, & similia in his usurpari solita.

III.

Nobis tamen hoc loci animus non est, singulas istas significationes latius persequi, cum disputatio nostra de illis tantum Iuribus Regalibus sit instituta, quæ per Imperatorem Fridericum recensentur in tit. Quæ sint Regalia.

IIII.

Regalia igitur, de quibus hîc acturi sumus, illa sunt Iura, quæ Imperatori Romano concessa & reservata sunt in signum supremæ potestatis

tis

tis ac præminentiæ, & in præmium immensi laboris, curarum & sollicitudinum, quas pro Romano Imperio eiusq; pace & tranquillitate conseruanda sustinet.

V.

Et dicuntur Regalia à nomine Regis, propterea quòd Feudistæ Imperatorē vt plurimum Regem appellant, eo procul dubio moti, quod Fridericus Imperator Romanorum, autor tituli Quæ sint Regalia, idem etiam Rex fuit Siciliae, eumq; titulum & constitutionem suam in illo quoque regno edidit & publicari fecit.

VI.

Hæc porrò Iura Imperatori Romanorum vt summo Principi reseruata, partim solam eius dignitatem ac supremam potestatem respiciunt, qua nimirum ipse solus facere potest, quod nulli alijs permissum est. Qualia sunt legitimare spurios, creare Tabelliones, famæ & honoribus restituere, & alia similia, De quibus pariter à nobis hîc nihil dicitur. Latissima quippe est Summi Principis potestas.

VII.

Alia verò sunt quæ vtilitatem Imperatoris & fiscum eius præcipuè concernunt, Qualia sunt quæ habentur in tit. Quæ sint Regalia in v-
lib.

Ab. Feud. Et de his principaliter hæc nostra instituta est disputatio.


VIII.

Causa autem introducendi hanc reservationem Iurium Regalium pro summo Principe, fuit ea partim, vt emolumenta quæ inde ad fiscum Imperatoris perueniunt, essent quasi præmium quoddam, pro curis & laboribus quos Reipub. causa & pro iustitia subditis administranda sustinere cogitur, partim verò vt huiusmodi Iura & ex eis prouenientia commoda, aliis fiscalibus Imperatoris redditibus coniuncta, nerui essent, ad ferendum onera, & procurandum necessaria quæque pro defensione Imperij ac subditorum eius, & conseruatione securitatis ac tranquillitatis in Republica & Imperio Romano.

IX.

Qua autem ratione ista Regalia ad Imperatorem Romanorum spectant, eadem & ad alios Reges ac Dominos superiorem non recognoscetes pertinent, sicut etiam de consuetudine seruari videmus.

CAP.



CAP. II.

INTER REGALIA QVÆ

numerentur.

X.

INTER REGALIA IGI- I.
tur hæc primo loco recensentur Ar-
mandiæ, cuius vocabuli variæ per
DD. adducuntur significationes. Sed nos hoc
loci existimamus Armandias intelligi de arma-
mentariis publicis, quæ (licet barbaro vocabu-
lo) sic dictæ fuerunt ab hominibus seu militibus
armandis, quòd in istis armamentariis militibus
in expeditionem mittendis arma idonea trade-
bantur, itaque milites armabantur.

XI.

Secundo viæ publicæ, quæ sunt in solo pu- II.
blico, & per quas iter patet vniuersis hominibus
ac toti populo, inter Regalia numerantur.

XII.

Publicæ autem ad differentiam priuata-
rum viarum dicuntur. Istæ enim non sunt de
Regalibus, sed Iuris priuati eorum, quorum gra-
tia sunt constitutæ.

C

Co-

XIII.

Cognoscuntur autem viæ publicæ à priuatis ex eo, quando vtrumq; caput, siue vtraq; extremitas viæ pertingit ad aliam viam publicam, quod in priuatis non fit, vbi semper vna saltem extremitas ad priuatum locum tendit.

XIII.

Porro cùm viæ publicæ ad eum spectent, qui habet Regalia in illo loco, consequens est, vt ad eum, qui Regalia habet, spectet etiam cognitio & punitio delicti in via publica commissi, licet alioquin Territorium eius regionis pertineat ad alium.

XV.

Quemadmodum etiam ad ipsum pertinet curare, vt viæ sint tutæ à latronibus & malefactoribus.

XVI.

Et cogitur etiam emendare damnum, si quod in via transeunti illatum est per prædones.

XVII.

Si tamen id contigerit in via solita & communiter vsurpata, aliâs si quis per insueta loca transiens damnum à prædonibus acceperit, do-

minus

minus ad quem Regalia spectant, id emendare non tenetur.

XVIII.

Tertio, item flumina Nauigabilia, & ex quibus fiunt nauigabilia, summo Principi sunt reseruata.

III.

XIX.

Quod est intelligendum de fluminibus publicis. Nam priuata à cæteris rebus priuatis, nihil differunt.

XX.

Numerantur autem hæc inter Regalia ratione supremæ iurisdictionis, quam Imperator vel Rex in his peculiariter sibi reseruata habet.

XXI.

Absque enim ipsius permissione in flumine publico nihil facere & ne aquam quidem ipso vetante ducere licet.

XXII.

Ratione verò defensionis, seu protectionis (vt quidam volunt) flumina publica de Regalibus non sunt, cum hac ratione inspecta plurima alia de Regalibus censerī deberent, quæ tamen inter Regalia nemo vnquam numerauit.

Nec ratione proprietatis ad Imperatorem vel Regem spectantis (vt existimauerunt alij) cum verius sit proprietatem publicorum fluminum eius esse populi vbi fluunt.

XXIIII.

Nihilominus tamen vsus horum fluminum publicus est, quemadmodum & Mare, littora maris, ac fluminum ripæ, in publico sunt vsu, & æquè omnibus patent, vtcunque proprietas & Regalia fluminum publicorum ad alios spectent.

XXV.

IIII. Quarto & portus inter Regalia numerantur, eadem ratione, qua flumina.

XXVI.

Licet enim portus publici sint, & proprietates eorum eius sint populi, vbi sunt portus.

XXVII.

Tamen Imperator in his sibi specialiter habet reservatam supremam iurisdictionem, ita, vt non minus circa portus, quàm circa flumina disponere possit.

XXVIII.

Nec minima huius reservati Iuris utilitas est,

est, ipsum vectigal, quod soluitur non tantum in portu, sed etiam in transitu per pontem, quod appellatur portorium, & spectat ad supremum Principem, tanquam Ius Regale.

XXIX.

Nisi vel ipsius Imperatoris concessione vel prescriptione sit aliis acquisitum.

XXX.

Est autem portus ex Vlpiani descriptione, conclusus locus, quo importantur merces & inde exportantur, ubi & statio nauium est conclusa atque munita, ut à ventis sint tutæ.

XXXI.

Quinto deinceps Ripatica (quæ nihil aliud sunt, quàm gabellæ quædam, seu vectigalia, quæ riparum ratione persoluantur) ad Imperatorem Regalium iure pertinent.

V.

XXXII.

Quamquam enim riparum usus sit publicus, ipsius autem ripæ proprietates eorum dominorum, qui iuxta ripas prædia possident.

XXXIII.

Adeò quod et arbores in ripis natæ, & fructus ex eis prouenientes sint eorum dominorum, quorum prædia ripis adiacent.

C 3

Et pos-

Et possit etiam dominus prædij, in ripa iuxta prædium suum ædificare volentem, prohibere ne ædificet, vel iam ædificatum propria autoritate destruere.

XXXV.

Attamen constitutum & introductum est, ut vectigalia certa riparum quoque nomine præstentur à nauigantibus, eaque ad summum Principem, hoc est, Imperatorem spectent.

XXXVI.

Et dicuntur ripatica à ripis, quæ flumen arctant, inque naturali rigore cursus sui tenent.

XXXVII.

Differuntque à litore, quod litus est Maris, Ripæ autem sunt fluminum.

XXXVIII.

Et quod Litorum proprietas ad neminem priuatim pertinet, sed eius est Iuris, cuius est & mare, & quæ subiacet mari, terra vel arena. Riparum verò proprietas est eorum, qui prope ripam prædia possident.

XXXIX.

VI. Sexto, vectigalia quoque siue Telonia Summo

mo Principi referuantur, & ad ipsum solum spectant.

XL.

Vestigal autem propriè quidem dicitur, quod præstatur Fisco Imperatoris vel Reipub. pro mercibus, quæ importantur & exportantur.

XLI.

Sed generalius publica vestigalia accipimus de omnibus iis, ex quibus vestigal Fiscus percipit, quale est vestigal portus, vel venalium rerum, Salinarum, Metallorum, & Picariarum.

XLII.

Nemo igitur alius, quàm solus Princeps, siue Imp. Romanus vestigalia imponere potest.

XLIII.

Idquæ non aliter, nisi rationabili ex causa publicam vtilitatem & necessitatem respiciente facere debet, alioquin mortaliter peccat.

XLIIII.

Tantoquæ minus Imperator aliis inferioribus concedere debet nouorum vestigaliũ impositionem, vel veterum auctorem, nisi causa cognita publica vtilitas hoc postulare videatur.

XLV.

Si aliter fiat, tunc & concedens & im-
trans

trans noua vectigalia mortaliter peccant , cum
hoc casu agentes & consentientes in pari sint
culpa, pariq; pœna plectantur.

XLVI.

Officialis autem à Principe ad exigendum
tale vectigal constitutus , absq; scrupulo consci-
entiæ id exigere potest. Ipse enim in perquirēda
causæ iustitia, curiosus esse non tenetur, sed præ-
sumere potest factum per Summum Principem
esse iustum.

XLVII.

Nisi omnino Notorium esset, vectigal si-
ne iusta causa impositum, idq; exactor certò sci-
ret , tunc enim exigendo eiusmodi vectigal ipse
quoq; peccaret.

XLVIII.

Sine permissu autem Imperatoris noua
vectigalia imposita, vectigalia licita non sunt, e-
tiam si decreto alicuius ciuitatis, vel à præside, vel
curia fuerint constituta.

XLIX.

Dicunturq; noua vectigalia etiam tunc,
cùm vetera augentur , ideoq; sine licentia Impe-
ratoris aucta non valent .

Quin

L.

Quin & tales, vectigalia noua sine permis-
su Imperatoris instituentes, vel augentes, Lege
Iulia de ambitu, Itemq; Lege Iulia de vi publica
(si per vim exigant) tenentur, & aquæ & ignis
interdictione siue deportatione de Iure Ciuili
plectuntur.

LI.

Et qui eiusmodi vectigalia fraudant, nihil
peccant.

LII.

Sed si legitima vectigalia quis fraudauerit,
tunc res, pro quibus vectigal erat soluendum, nec
fuit solutum, in commissum incidunt, hoc est, do-
minium illarum statim amittitur & Fisco acqui-
ritur.

LIII.

Quanquam possessio per sententiam Iu-
dicis domino aut vectori sit auferenda, non pro-
pria autoritate inuadenda.

LIIII.

Fraudare autem vectigal non is tantum
dicitur, qui res vectigales non proficitur, sed etia-
am, qui per viam transuersam & insolitam de-
fert merces, vt vectigal fraudet.

D

Et suf-

Et sufficit tunc, quod quis à via solita deflectere cœperit; Nam talis pro fraudatore habetur.

LVI.

Nisi docere quis possit, se non fraudandi gratia, sed ob hostium, vel latronum probabilem timorem, aut aliam ob iustam causam à via recta diuertisse.

LVII.

VII. Septimo præterea & Monetæ, hoc est, Ius formandæ & cudendæ Monetæ ad solum Imperatorem spectat, & est de Regalibus.

LVIII.

Pessimè igitur faciunt, qui Regalia non habentes, nihilominus Monetas cudunt, Non enim veram, sed adulterinam Monetam faciunt, ideoq; impuniti non relinquuntur.

LIX.

Grauius autem illi delinquant, qui falsam Monetam sub alieno titulo aut imagine cudunt. Proindeq; Iure Ciuili acerbissimæ in eos pœnæ sunt constitutæ.

LX.

Nam qui de nouo sub imagine, aut titulo
Impe-

Imperatoris falsam Monetam formauerint, hi
flammarum exustionibus mancipantur, & ita
communiter intelligi solet tex. in L. ij. C. de
falsa Mone.

LXI.

Qui verò sub titulo inferioris ab Impera-
tore, puta Principis alicuius, vel Ciuitatis falsam
Monetam de nouo cudunt, hi capitis supplicio
afficiuntur, sicut à plerisque accipitur tex. in L. i.
C. de falsa Mone.

LXII.

Quod nos contra Ioannem Cremonen-
sem & quosdam alios accipiendum existimamus
de poena mortis naturalis cuiusmodi delinquenti-
bus infligenda, non autem de poena capitali ci-
tra mortem (vt idē Ioannes volebat) nam expo-
sitioni ipsius verba d. L. i. omnino repugnant.

LXIII.

Domus quoq; vel fundus, in quo huiusmo-
di scelus perpetratum est, Fisco vendicatur, cum
distinctione tamen, de qua in d. L. i. C. de fals.
Mone.

LXIII.

Nouis autem Sac. Rom. Imp. constitu-
D 2 tioni-

tionibus pœnalibus Art. C X I. approbatur
prima Azonis opinio, & vltima (quæ Azoni
consentit) relata per Gloss, in d. L. ij. C. de fals.
Mone. quod scilicet falsam Monetam de nouo
cudentes, absq; distinctione an sub Cæsaris, vel
alterius Principis, aut ciuitatis titulo eam forma-
uerint, flammis exurantur. Quam interpretatio-
nem vt veriore & consuetudine approbatam,
nos quoque sequimur, licet communis illa paulò
antè relata (seposita autoritate Carolinæ con-
stitutionis) iuxta terminos veteris Iuris Ciuilis
facile etiam defendi possit, præsertim si distin-
guatur inter Monetam auream & argenteam,
vel æream, aut argenteam ære permixtam.

LXV.

Illis etiam, qui Monetas de nouo non cu-
dunt, vel formant, sed iam formatas radunt, aut
tondunt, siue alia quacuncq; ratione, aut ingenio
diminuunt, quiue Monetas tingunt, Iure Ciuili
Romanorum, si perpetrantes sint liberi, ea impo-
nitur pœna, vt ad bestias damnentur, sin autem
sint ser^u_u^u_u immo supplicio afficiantur.

LXVI.

Cuius delicti pœna iuxta Carolinas consti-
tutiones d. Art. C X I. hodie in Imperio est ex-
traordinaria & arbitraria, quæ pro delicti qua-
lita-

litate etiam ad pœnam vsq; mortis naturalis inclusiuè extendi potest.

LXVII.

Eademq; pœna manet eos, qui scienter & dolosè falsam Monetam expendunt. Licet enim Carolina constitutio præallegata in hos quoque flammæ supplicium statuât, nos tamen eam ad terminos veteris Cæsarei Iuris reducendam & interpretandam censemus, Ita videlicet, vt Iudex tam grauempœnam nunquam arbitretur, nisi delicti magnitudo hoc postulare videatur.

LXVIII.

Ad hæc octauo loco mulctarum, pœnarumq; compendia Regalibus adnumerantur. VIII.

LXIX.

Vnde infertur, quod ybicunque per legem mentio fit, de aliqua mulcta, vel pœna pecuniaria, neque exprimitur, cui illa sit applicanda, tunc in dubio illa ad Fiscum Imperatoris pertineat, cum declaratione tamen, de qua per Bart. in L. agraria, ff. de termi. moto.

LXX.

Hoc autem de seuerioribus & illis quidem mulctis est intelligendum, quas Iudex principaliter ob criminis castigationem delinquentibus

imponit. Sed quas quisq; Magistratus etiam me-
rum Imperium non habens ad defensionem Iu-
risdictionis suæ contemptoribus indicit, hæ non
ad Imperatoris Fiscum, sed ad ipsum Iudicem,
vel ad quos de speciali Iure, aut consuetudine
pertinuisse noscuntur, etiamnum spectant.

LXXI.

Et si verò Labeo I. C. nihil interessè puta-
uerit inter multam & pœnam, atamen rectè
in hoc à Paulo fuit reprehensus, qui in L. si qua
pœna 244. ff. de verborum significat, tres nota-
biles inter hæc ponit differentias.

LXXII.

Quarum prima est, quòd de pœna lege
constituta prouocatio nulla est, At multæ pro-
uocatio est.

LXXIII.

Altera differentia est, quòd pœnæ singulo-
rum delictorum certæ à legibus sunt constitutæ,
Multæ verò non sunt certò definitæ, sed Iudi-
cis potestati & arbitrio relictæ, sic tamen, vt mo-
dum in multando Iudex non excedat.

LXXIIII.

Quod declaramus, vt procedat, si de Iure
ordinario

ordinario quærat, secus verò est, si agatur Iure
extraordinario (prout hodie vt plurimum fie-
ri solet) nam tunc pœna est arbitraria Iudici, ita
tamen, vt neque in aggrauanda, neq; in mitigan-
da pœna moderationem excedat.

LXXV.

Tertia est, quod mulctæ impositio nulla
est, nisi is eam dixerit, cui dicere licet, hoc est
(quemadmodum Vlp. declarat in L. aliud est
fraus 131. ff. de verb. signif.) nisi eam dixerit is
Magistratus, cui iudicatio publicè data est, quicq;
publicè iudicium exercet, quales sunt Consules,
Præsides prouinciarum, Prætores, ac similes;
pœnam autem irrogare quisq; potest, cui certi
alicuius criminis executio competit.

LXXVI.

Quartam differentiam addit Vlpianus
in d. L. aliud est fraus, quod mulctæ species est,
pœna verò generale nomen, ita quidem, vt om-
nis mulctæ sit & pœna, sed non omnis pœna est
mulctæ.

LXXVII.

Idem Vlpianus & quintam differentiam
ponit, quod mulctæ animaduersio sit pecuniaria,
pœna autem non tantum pecuniaria, verum &
capitis, & existimationis esse soleat.

Nono

IX. Nonno in super bona vacantia Fisco Imperatoris reseruata sunt ex L. Iulia, quam Vlpianus I. C. in suis fragmentis Caducariam vocat.

LXXXIX.

Quo loco bona vacantia intelligimus illa, quibus post mortem nullus hæres existit, hoc est, vbi deficiunt ascendentes, descendentes, agnati, cognati, aut alij legitimi successores.

LXXX.

Hocq; nomine bona vacantia differunt ab hæreditate iacente. Nam licet in bonis hæreditatis iacentis, nondum appareat aliquis hæres, spes tamen & expectatio est, aliquem ex legitimis successoribus hæreditatem aditurum. Sed vacantia bona tunc esse dicimus, quando futuri cuius hæredis nulla spes amplius superest.

LXXXI.

Quod etiam Ius porrigitur ad Collegium deficiens, nam illo dissoluto absq; successoribus, bona quæcunque Collegium habuit, deuoluuntur ad Fiscum.

LXXXII.

Istæq; deuolutio & translatio ad Fiscum Imperatoris, fit ipso Iure, adeò, vt necessaria non sit

sit aditio, sed statim atq; bona vacant, dominiū m
eorum Fisco acquiratur.

LXXXIII.

Possessio autem Fisco non quæritur, nisi
facta per Fiscī Officiales incorporatione & occu-
patione eorundem bonorum.

LXXXIIII.

Ac tunc quidem Fiscus bona eiusmodi
capit non vt hæres hæreditatem, sed vt Fiscus
bona vacantia.

LXXXV.

Ex quo inferitur, quòd Fiscus etiamsi in-
uentarium non fecerit, tamen non teneatur Cre-
ditoribus defuncti vltra vires occupatorum bo-
norum.

LXXXVI.

Ququam teneatur ad præstandum &
subeundum ea onera, ad quæ bonorum suorum
nomine tenebatur is, cui Fiscus successit.

LXXXVII.

Nec debet Fiscus, aut eius Officiales, cū
per delatores bona vti vacantia Fisco nunciata
sunt, in ea continuò inuolare, sed proclamatio-
nem, seu denunciationem, siue citationem ali-
quam in publico ante omnia proponere, vt si
E
quis

quis fortè sit, qui ad defuncti successionem Ius li-
bi competere existimet, is intra terminum com-
petentem ad hoc præfixum compareat, ac de Iu-
re suo legitimè doceat.

LXXXVIII.

Fiscum etenim non decet afferre præiudi-
cium ex occupatione bonorum illis, qui alioquin
vel ex testamento, vel ab intestato quocumq; Iure
succedere possent defuncto.

LXXXIX.

Postquam verò tempus præstitutum in
proclamate effluxit, tunc demum regulariter
omnes successionis Ius prætendentes habentur
pro exclusis, ita, vt Fisci Officialibus libera sit fa-
cultas ea bona, quæ apparent vacantia, occupa-
di, & Fisco Imperatoris incorporandi.

XC.

Præter tamen eas personas, quæ ad succes-
sionem defuncti, siue ex testamento, siue ab inte-
stato vocantur (inter quas ultimo gradu collo-
cari solent vir & vxor) non pauci alij reperiun-
tur, qui Fiscum bona tanquam vacantia occupa-
re volentem excludunt.

XCI.

Namque aliquo mortuo ex Doctõribus
vnius

vnus Collegij absq; hæredibus, ad ipsū Collegi-
um Doctorū excluso Fisco bona eius deferūtur.

XCII.

Sic studioso absq; hæredibus in vniuersi-
tate defuncto, ad bona eius vniuersitas admitti-
tur, Fisco excluso.

XCIII.

Idem dicendum est de aliis Collegiis lici-
tis, de quibus plura exempla ponuntur in L. 1.
& toto tit. C. de hæred. decurio. vbi Bald. & alij
ad multa similia idem extendunt.

XCIII.

Sed & tutor pupillo sine hæredibus mor-
tuo, Fiscum à pupilli successione excludit.

XCIV.

Ciuitas autem ciue suo absq; hæredibus de-
functo, ad bona eius non admittitur, sed ad Fis-
cum illa pertinent.

XCV.

Deniq; & ob temporis cursum Fiscus à pe-
titione bonorum vacantium excludi potest, per
bonorum possessores.

XCVI.

Sed hoc variè. Nam siquidem Fisco denun-
ciata fuerunt bona, & debitor à denunciatione

destitit, tunc quadriennio à tempore nunciatio-
nis elapso, possessor est tutus contra omnes de-
ferre volentes. Nec quaeritur, vtrum cum titulo,
aut bona fide possideat, nisi primus delator fue-
rit prauaricatus.

XCVIII.

Sin autem Fisco bona non fuerint nuncia-
ta, tunc per eum, qui non possidet cum titulo &
bona fide, non aliter excluditur Fiscus, quàm
spatio viginti annorum, computando ex eo tem-
pore, quo bona vacare coeperunt.

XCIX.

Quòd si quis cum titulo & bona fide ea pos-
sideat, tunc eiusmodi bona praescribuntur tem-
pore communi in praescriptionibus definito, hoc
est, si mobilia sunt spatio trium annorum, si im-
mobilia decem annorum.

C.

X. Decimo reseruantur summo Principi ea,
quæ quibusdam vt indignis per leges auferun-
tur.

CI.

Quæ bona Vlpianus in fragmentis suis e-
reptitia vocat, eò quòd indignis eripiantur & ad
Fiscum transferantur.

Hæc q̃

CII.

Hæcque multum differunt à Caducis, Nam Caduca bona sunt ea, quæ mortuo Testatore priusquam acquirantur his quibus relicta sunt, deficiunt,

CIII.

Ereptitia verò sunt illa quæ iam sunt acquisita, sed post acquisitionem rursus vt indignis auferuntur.

CIII.

Præterea Caduca, licet olim ad Fiscum quoque pertinuerint, hodie tamen non pertinent, sed apud hæredem remanent, cum onere tamen eis adscripto, Iure Caducorum ex noua Iustiniani constitutione sublata.

CV.

At Ereptitia, siue ea quæ vt indignis auferuntur etiam hodie ad Fiscum Imperatoris spectant.

CVI.

Ob multas verò causas bona vt indignis auferuntur, & Fisco vendicantur, De quibus integri sunt tituli, ff. & C. de his quibus vt indig. ad quos remittimus.

In casibus tamen nonnullis bona vt indignis ablata, non ad Fiscum pertinent sed specialiter quibusdam conceduntur.

CVIII.

Quorum vnus est, quando Legatarius, qui Testamento tutor datus est filio testatoris, tutelæ onus recusat: ei namq; vt indigno Legatum aufertur, & relinquitur filio Testatoris cuius utilitates desertæ sunt,

CIX.

Nisi euidenter Testator expresserit, velle se dare Legatum, etiam si Legatarius filij tutelam non administrauerit, tunc etenim Legatum huic Legatario non aufertur.

CX.

Alter casus est, cùm Legatarius vel Fideicommissarius celauit tabulas testamenti, quæ postea emerferunt in lucem. Is enim Legatum vel Fideicommissũ sibi relictum vt indignus quidem perdit, Sed huic ablatum hæredi applicatur, vel ei personæ, cuius fauorem respicit illa causa, propter quam ipsi vt indigno bona auferuntur.

CXI.

Item si hæres rogatus restituere, non adeat hære-

hæreditatem, donec postulâte Fideicommissario per Præto- rem adire ac restituere cogatur, perdit is velut indignus quartam Trebellianicam, quam aliàs deducere potuisset, eaq; ad Fideicommissarium, non autem ad Fiscum deuoluitur.

CXII.

Porro si puella Tutori vel Curatori suo aut eius filio vel Nepoti nupserit, eiq; aliquid donauerit, sic donatum vt indigno aufertur: non tamen Fisco, sed ipsi puellæ restituitur.

CXIII.

Deniq; si maritus vxorem suam occiderit, eo casu quo aliàs ipsa mortua, dos apud maritum remansura fuerat, dos ei vt indigno aufertur, & hæredibus vxoris redditur.

CXIIII.

His addunt nonnulli casum L. 1. C. de secund. nup. vbi mulieri nubenti intra annum luctus, tanquam indignæ auferuntur omnia ea quæ à primo viro titulo hæreditatis, Legatorum, Fideicommissorum, suprema voluntate relictorum, vel mortis causa donationum fuerat consecuta. Hæcque ablata hæredibus mariti vel cohæredibus aut ab intestato succedentibus vendicantur. Sed nos hanc poenam secundò nubent-

nubentis mulieris, Iure diuino sublatam cen-
mus.

CXV.

XI. Vndecimo Fisco Imperatoris referuantur
bona contrahentium incæstas nuptias.

CXVI.

Incæstas autem nuptias ij dicuntur contra-
here, qui vxorem duxerunt vnam ex his, quas le-
gibus aut moribus prohibemur vxores duc-
re.

CXVII.

Qui quidem sic contrahentes vltra bono-
rum confiscationem, etiam alias pœnas legibus
definitas sustinent.

CXVIII.

Si tamen is, qui eiusmodi nuptias contraxit,
ex priori fortè matrimonio filium aut filios vel
filias, Nepotes aut Neptes, vel Pronepotes aut
Proneptes habeat, tunc illis bona patris relin-
quuntur, Fisco nihil Iuris in eis sibi vendicante,
sic tamen vt patri alimenta præstent.

CXIX.

Quibus non extantibus bona contrahen-
tium Fisco applicantur.

Hæc

CXX.

Hæc autem pœna confiscationis bonorum procedit solùm in eo, vel iis, qui incæstas nuptias contrahunt.

CXXI.

Nec aliter hanc pœnam contrahentes incurrunt, nisi scienter contraxerint, aut post errorem compertum in coniunctione illicita perseuerauerint.

CXXII.

Qui verò errore acerrimo, non affectato, simulatoue, neq; ex vili causa decepti, aut ætatis lubrico lapsi sunt, ab hac pœna excusantur, si errore comperto, vel vbi ad legitimos peruenerint annos, coniunctionem huiusmodi sine vlla procrastinatione diremerint.

CXXIII.

Porro qui sponsalia tantùm incæsta de futuro contraxerunt, istam pœnam non sustinent nisi copula carnalis secuta sit.

CXXIII.

Similiter etiam incestum simpliciter committens, bona sua non amittit, quanquam aliis pœnis grauissimis afficiatur.

F

Neq;

Neq; ij etiam huic pœnæ subiacent, qui matrimonium contraxerunt in aliquo gradu ultra leges Ciuiles per Ius Canonicum prohibito, sed his tantum ista pœna imponitur, qui nuptias contrahunt in gradu,quem Ius Ciuile vetat.

CXXVI.

Denique si per summum Pontificem fuerit dispensatum super tali matrimonio, in casu quo potest, iuxta tradita per D D. in c. literas, de restit. spol. Tunc culpa sublata, cessat etiam pœna,

CXXVII.

Quanquam si dispensatio simpliciter facta sit super matrimonio, non videatur ob hoc præiudicari Fisco, ad quem bona contrahentium ipso Iure iam deuoluta fuerunt.

CXXVIII.

- XII. Bona etiam condemnatorum ad mortem & proscriptorum, duodecimo loco ad Fiscum Imperatoris pertinent, Sed hoc in iis casibus tantum, in quibus secundum nouas constitutiones bona damnatorum publicantur.

CXXIX.

Licet enim veteri Iure pœna confiscationis
bqno-

bonorum generaliter veniret imponenda omnibus illis, quibus imposita erat poena mortis naturalis, vel proscriptionis aut deportationis, idque velut inconsequentiam quandam.

CXXX.

Hodie tamen ex noua Iustiniani constitutione bona damnatorum ad ipsorum ascendentes, & descendentes, usque ad tertium gradum inclusiuè deferuntur.

CXXXI.

Quod Irnerius in auct. bona damnatorum. C. de bon. proscript, etiam ad collaterales intra quartum gradum existentes, producendum existimauit, quanquam Iustiniani constitutio de collateralibus nullam prorsus mentionem faciat. Istaque Irnerij sententia communiter à Doctolibus recepta est.

CXXXII.

Vxores quoque dotes suas, & quod dotis loco succedit, item donationes propter nuptias, ex damnatorum bonis consequuntur.

CXXXIII.

Supradictis verò personis deficientibus damnatorum bona Fisco applicantur.

De crimine autem læsæ Maiestatis damnati bona, statim Fisco vendicantur, exclusis etiam filiis seu liberis eius.

CXXXV.

Idemq; obtinet si quis de hæresi damnatus fuerit.

CXXXVI.

XIII. Supradictis Regalibus decimo tertio annumerantur quoq; angariæ, parangariæ plaustrorum, nauiumq; præstationes.

CXXXVII.

Sunt autem angariæ non onera personalia, uti malè quidam interpretati sunt, sed patrimonialia siue realia.

CXXXVIII.

Et dicuntur angariæ, præstationes iumentorum, plaustrorum, nauium, aliarumq; operarum extraordinariarum, quæ prouincialibus aut militibus imponuntur in transuactione armorum, aut aliorum quorumq; onerum, causa publicæ necessitatis.

CXXXIX.

Parangariæ verò eadem planè onera eademq; præstationes continent, & in hoc solum ab an-

angariis differunt, quod angaria est, qua cursus publicus dirigitur, sed parangaria cum alio verum huiusmodi onera exiguntur.

CXL

Additur decimo quarto & extraordinaria collatio, ad felicissimam regalis numinis expeditionem. Quod Ius eiusmodi collationem exigendi, summo tantum Principi competit & seruatum est. XIII.

CXLI.

Vbicunque enim ordinarij redditus non sufficiunt pro statu Imperij conseruando, nec Imperator habet de suo proprio, vnde difficultatibus & necessitatibus Rempub. vrgentibus occurrere queat, tunc extraordinariam collationem, siue (vt DD. loquuntur) collectam, aut subuentionem subditis imponere potest.

CXLII.

Quemadmodum & cum Imperium ab hostibus inuaditur, aut probabilis timor subest, aliquius subitanæ aut improuise inuasionis, potest Imperator omnes ad pugnam aptos, pro modo instantis periculi ad arma & Imperij defensionem euocare.

CXLIII.

Eademq; ratione & cum alij casus de nouo

emergunt, propter quos communis utilitas
gratia necessum est, maiores expensas facere,
Vel cum tractatur de honesto statu Principis
conseruando, cui redditus ordinarij & consuetæ
collationes siue indictiones non sufficiunt, licet
extraordinarias collationes à subditis exigere.

CXLIIII.

Moderatio tamen & æqualitas conueniens
in his maximè tenenda est, summeq; cauendum
iusto Principi, ne sub prætextu necessitatum pu-
blicarum subditi nimium grauentur.

CXLV.

Vicissim autem non est ferenda quorun-
dam siue malitia, siue proteruia, qui cum à supe-
riore subuentio seu extraordinaria collatio exi-
gitur, nullam subesse iustam causam, sed præter
necessitatem subditos excoriari clamitant. Hu-
ius enim rei cognitio non ad singulos, neque ad
multos, sed ad vniuersos pertinet, qui non nisi
maxima & euidentissima ex causa, huiusmodi
collationes recusare possunt.

CXLVI.

Nec iuuantur subditi allegantes priuile-
gia ipsis concessa super immunitate indictionum
siue superindictorum. Quoniam hæc ab ex-
traor-

traordinariis istis collationibus, quæ ex nouis & inopinatis casibus emergere solent, ipsos non eximunt, cum de his per dantem priuilegia non censeatur fuisse cogitatum.

CXLVII.

Decimo quinto potestas constituendorum XV.
Magistratuum ad iustitiam expediendam de re-
seruatis est summo Principi.

CXLVIII.

Cum enim potestas hæc olim apud popu-
lum Romanum fuerit, is autem lege Regia om-
ne imperium & potestatem suam in Principem
Romanum transtulerit, simul etiam potestas
hæc creandorum Magistratuum ad ipsum tran-
siuit.

CXLIX.

Et si, verò apud alios quoque inferiores
ab Imperatore Principes, Duces, Comites, Ba-
rones, aliosque dominos merum & mixtum im-
perium vna cum iurisdictione, & Ius creando-
rum Magistratuum & Officialium esse videam-
us, tamen Magistratus & Officiales ab his
constituti, iurisdictionem ab Imperatore habere
censentur.

Apud

CL.
Apud ipsum enim Imperatorem est, & manet iurisdictionis tanquam apud fontē, ex quo fluunt & refluunt omnes aliæ iurisdictiones, perque ipsum tanquam caput Imperij, in omnia eius membra diffunduntur.

CLI.

Ideoq; licet Imperator alicui Iurisdictionem dederit, nunquam tamen tantum dedisse videtur, quin plus apud ipsum remaneat.

CLII.

Hincq; fit, quod si Imperator cœpit cognoscere de causa, quæ alioquin pertineret ad notionem alterius Iudicis ordinarij vel delegati, statim conquiescit & silet omnis alia Iurisdictionis.

CLIII.

XVI.

Inter Regalia quoque decimo sexto numerantur & argentariæ, quæ nihil aliud sunt, quàm argenti venæ, seu argenti fodinæ, & ad Fiscum Imperatoris spectare dicuntur, propterea quòd Imperator ex argento quod foditur, etiam in priuato alicuius solo, semper aliquam partem siue Canonem percipere debet.

Idemq;

CLIIII.

Idemq; censendum est de Aurifodinis.

CLV.

Sed & de aliis metallis idem iudicari solet
de consuetudine.

CLVI.

Canon verò Imperatoris Fisco de metallis
debitus, non semper vnus idemq; est. Nam &
pro metallorum & pro temporum ac locorum
diuersitate, alius atque alius olim præstabatur.

CLVII.

Quare in eiusmodi Canone præstando
propria cuiusque loci consuetudo retinenda
est.

CLVIII.

Illud denique affirmamus, quod Metalla-
rij, quicquid Metallorum vltra Canonem Prin-
cipi præstitum collegerint, Fisco eiusdem
Principis pro competenti pretio vendere co-
gantur, quod & hodie plerisque in locis seruari,
& hoc Ius inter Regalia connumerari vide-
mus.

CLIX.

Decimo septimo, & Palatia seu Domus
G aut XVII

aut Reges dominica, in civitatibus concessa
Regalia ponuntur.

CLX.

Ea etenim nemini inhabitare licet, nisi ipsi
Imperatori aut Regi, vel quibus id à summo Prin-
cipe concessum est.

CLXI.

XVIII. Piscationum insuper redditus decimo octa-
uo Regalibus annumerantur.

CLXII.

Idque propterea, quoniam nemo præter
summum Principem hanc facultatem habet, vt
alicui soli in certa aliqua parte fluminis vel ma-
ris, piscandi ius concedere possit.

CLXIII.

Ex quo ita concessio Iure, certa pensio
constituta, redditus piscationis vocatur.

CLXIII.

Aliàs piscandi facultas omnibus commu-
nis est, tam in mari, quàm in fluminibus.

CLXV.

XIX. Deinceps & salinarum redditus de Rega-
libus esse dicuntur, quoniam de his certa præ-
stantur vectigalia, seu portiones, ad instar Me-
talli-

tallicorum Canonum, qui ad summum tantum Principem pertinent.

CLXVI.

At de consuetudine (quæ in his semper spectari debet) in plerisque locis, quicquid salis eruitur aut coquitur ultra Canonem debitum, id ipsi Imperatori, vel Principi, qui concessa sibi ab Imperatore habet Regalia, pro competenti pretio vendi debet, ut per suos deinde Officiales aliis rursum distrahi possit.

CLXVII.

Vicesimo inter Regalia numerantur bona committentium crimine læsæ Maiestatis: Horum namque omnis substantia, ultra alias poenas publicatur, & Fisco applicatur, exclusis quoque liberis condemnati.

XX.

CLXVIII.

Maiestas autem propriè (post Deum) tribuitur populo Romano, & Imperatori, in quem Lege Regia omne imperium omnisque potestas translata est.

CLXIX.

Maiestatis verò crimen committit is, qui hostili animo aduersus Rempub. vel summum Principem animatus est, quiue aduersus Populi Romani securitatem, siue tranquillitatem aliquid molitur.

G 2

Ei

CLXX.
Eidemq; crimini obnoxius est, qui de nece
virozum Illustrium, & Senatorum, qui consiliis
& consistorio summi Principis intersunt, parsq;
corporis eius censentur, vel cuiuslibet alterius
qui à latere Principi militat, cogitauerit, & ad a-
ctum aliquem, quo cogitatum scelus perficeret,
processerit.

CLXXI.

Cuius pœna est, vt reus gladio feriat,ur,
bonis eius omnibus Fisco addictis.

CLXXII.

In filios quoque committentium hoc cri-
men, paterni sceleris pœna progreditur, iuxta
modum de quo in L. quisquis C. ad Leg. Iul.
Maiest.

CLXXIII.

Sed & satellites, conscij, ac ministri tanti
criminis, eorumque filij, eisdem pœnis subia-
cent.

CLXXIIII.

Nec ipsa etiam morte ab hoc crimine eius-
que pœna Reus eximitur. Etenim nisi à succes-
soribus purgetur, hæreditas eius Fisco vendica-
tur, & mortui quoque memoria damnatur.

Verum

CLXXV.

Verum hæc tum demum obtinent, ubi contra ipsam Rempub. vel supremum Principem, eiusq; lateri assistentes, eiusmodi crimen attentatum est.

CLXXVI.

At ubi aduersus inferiorem Principem eiusue collaterales, aliove modo hoc crimen committitur, etiamsi id altero quoque capite Legis Iuliæ Maiestatis contineatur, tamen delinquentis bona hæredibus non adimenda, sed ipsum tantum mortis supplicio afficiendum putamus.

CLXXVII.

Illud quoq; falsum esse defendemus, quod à plerisq; traditum est, eum qui saluam guardiam aut saluum conductum, siue securitatem alicui concessam à summo Principe, fregit aut violauit, in pœnam d. L. quisquis incidere. Id enim nullo lure probatur.

CLXXVIII.

Crimen tamē ipsum huiusmodi violatoris modò atrocius, modò leuius esse potest. Vnde cū certa pœna super eo nō sit legibus definita, extraordinariè pro Iudicis arbitrio puniri poterit.

Eamq; pœnam Iudici, etiam vsque ad pœnam mortis naturalis inclusiue pro criminis atrocitate extendere licebit.

CLXXX.

XXI. Ad extremum inter Regalia connumeratur pars dimidia thesauri, in loco Cæsaris non data ad hoc opera inuenti, ea namque ad ipsum Imperatorem pertinet, altera dimidia Inuentori relicta.

CLXXXI.

Quod si data opera quæsitus & inuentus fuerit thesaurus, totus ad Imperatorem spectat.

CLXXXII.

Accipimus autem hîc thesaurum, pro veteri deposita pecunia, cuius non extat memoria, ita quòd Dominus eius ignoretur.

CLXXXIII.

Nam quod quis vel lucri, vel metus, vel custodiæ causa sub terra condidit, non thesaurus est, sed abscondita res, seu occultata pecunia, cuius proinde furtum fit, si ab aliquo fraudulenter contrectetur.

CLXXXIIII.

Locum quoque Cæsaris intelligendum
hîc

hic putamus, non cum tantum qui proprius est
Cæsaris, & Fiscalis, sed etiam qui publicus est,
ratione autem supremæ iurisdictionis ad Impe-
ratorem spectat.

CLXXXV.

Sanè thesaurus magica inuentus arte, eti-
am in proprio fundo, fit Cæsaris & Fisci.

CLXXXVI.

Absque verò magica inuentus arte in pro-
prio agro, totus fit Inuentoris, etiam si data opera
quæsitus fuerit.

CLXXXVII.

At si quis in alieno fundo aut loco, data
ad hoc opera thesaurum inuenerit, absque distin-
ctione is totus ad Dominum fundi spectat.

CLXXXVIII.

Quod si fortuitò in agro alieno thesaurus
inuentus sit, dimidia pars eius Domino agri, al-
tera verò dimidia Inuentori cedit.

CLXXXIX.

In loco religioso thesaurum non data ope-
ra inuentum, Imperator Fridericus pro dimidia
parte ad Fiscum, pro alia verò dimidia ad In-
uentorem spectare voluit, approbans in hoc
(contra Iustinianum Imperatorem) Diuorum
fratrum

fratrum constitutionem, relatum per Camerarium in L. ii. §. Si in locis ff. de Iure Fisci.

CXC.

Sed nos hodie religiosius facturum esse Imperatorem credimus, si partem thesauri in loco religioso inuenti, ipsi loco religioso reliquerit, altera parte inuentori concessa. Habent enim loca sacra & religiosa apud Christianos, sua quoque propria Iura, & suos Prælatos, quibus non minus deberi potest dimidia thesauri inuenti, atque si quis in agro vel fundo alieno thesaurum inuenisset.

CXCI.

Quòd si quis thesaurum inuenit, partem autem ad alium pertinentem suppresserit, dicimus hunc furtum committere, ac proinde in conscientia ad restitutionem teneri.

CXCII.

Idemque re detecta de Iure sic punitur, ut si partem ad Fiscum pertinentem occultauerit, totum thesaurum inuentum cum altero tanto cogatur Fisco exsoluere.

CXCIII.

At si partem ad alium spectantem celaue-
rit, nihil omnino ex thesauro consequatur, sed
quic-

quicquid inuenit, Domino eius loci, in quo inuenit, restituere compellatur.

CXCIII.

Addimus denique, quòd in itinere fortè aut casu inueniens Bulgettam aut Vallisiam (vti vocant) siue sacculum cum aureis, gemmis, margaritis, vel argento, seu quacunque moneta, etiam si in proprio solo inuenerit, thesaurum inuenisse non censetur, Ideoque nec totum quod inuenit, nec partem aliquam suam facit, ac proinde ad restitutionem tenetur.

CXCV.

Neque excusatur à peccato, si ignoret ad quem res inuenta pertineat, Debet enim tunc publicè rem inuentam denunciari facere.

CXCVI.

Et si ne sic quidem Dominus compareat, adhuc tamen bona conscientia eiusmodi pecunia vel res per Inuentorem teneri non poterit, nisi fortè pauper sit, & de licentia Episcopi, poenitentiarij, vel confessorij sui id faciat,

CXCVII.

Sed si Inuentor non sit pauper, tunc debet hac pecunia præsentari Episcopo, vel iis, qui

H

pau-

pauperum curam habent, vt distribuatur inter
iplos pauperes.

CXCVIII.

Et haftenus quidem de Regalibus enu-
meratis in tit. Quæ sint Regal. in vsib. feud.

CXCIX.

Sed vltra prædicta à nonnullis dubitatur
de illo Iure venandi, quòd Principes ac magni
Domini ipsis solis vendicant, cum Iure prohiben-
di alios, vtrum scilicet hoc Ius sit de Regalibus?
Et putamus non esse.

CC.

De Collectis etiam quas Domini quidam
suis subditis, & ciuitatum Rectores suis ciuibus
imponere solent, Quæritur, an illæ sint de Rega-
libus summo Principi reseruatis? Qua in re nos
distingnendum arbitramur.

CCI.

Aut enim Dominus, Ciuitas, Vniuersitas,
vel vicinia, non per modum Imperij aut Iurisdic-
tionis, quasi inuitis subditis, sed priuata auto-
ritate, & communi decreto prouincialium Col-
lectam imponunt, ob necessitatem communem
illorum qui collectantur, & sine qua Collectam
imponentes suam administrationem perficere
non

non possunt, puta propter dissolutionem æris alieni, quo ciuitas premitur, vel propter expensas faciendas in aliqua lite ob defendenda Iura Pro-
uinciæ, Vniuersitatis, Ciuitatis, aut viciniæ alicuius: Et tunc eiusmodi Collecta non censetur de Regalibus, ideoq; etiam sine licentia Imperatoris necessitate vrgente imponi potest.


CCII.

Imò ex causa necessitatis cogitur Vniuersitas, vel Ciuitas, aut Municipium aliquod Collectam imponere, & si arcam vel bursam communem non habet, compelluntur eam facere, vt aliquid commune habeant pro communitatis necessitatibus subleuandis.

CCIII.

Aut verò tractatur de imponenda etiam inuitis subditis Collecta, Iure Imperij & Iurisdictionis, absq; necessitate communi, ex causa tantum voluntaria, vel propter vtilitatem aliquam, puta, quia Ciuitas vult extruere domum nouam, vel facere aliquid simile, & tunc Collecta eiusmodi censetur de Regalibus, ideoq; per inferiores Dominos, vel Ciuitates imponi non potest subditis inuitis, nisi impetrata licentia à summo Principe.

Denique pro complemento huius capitis
sciendum est, non sic constringi Iura Regalia,
quasi nulla sint, præter ea, quæ commemorantur
in supradicta constitutione Imperatoris Fride-
rici. Fatemur etenim, Imperatorem specialiter &
de nouo sibi alia quoque plura reseruare posse,
circa quæ nouæ Imperatorum constitutiones,
& stylus seu consuetudo Imperialis Curia spe-
ctari debent.



C A P. III.

*AN ET QVOMODO POS-
sint Regalia concedi, aut acquiri aliis in-
ferioribus ab Imperatore vel Rege?*

CCV.

PORRO ETSI REGALIA
supradicta ad Imperatorē tanquam
summum Principem pertineant, eiq;
soli reseruata sint, tanquam concernentia decus
& honorem altitudinis ipsius.

CCVI.

Tantique etiam censeantur valoris, vt pre-
tio numerario non videantur posse æstimari.

Adcò

CCVII.

Adeò quod quidam existimauerint, illa vendi aut donari non posse, siquidem eo modo vehementer debilitetur Imperium, cuius vires in istis potissimum Regalibus consistunt.

CCVIII.

Tamen receptius est huiusmodi Regalia summo Principi reseruata, etiam aliis inferioribus ab Imperatore posse acquiri, & id quidem vno ex duobus modis.

CCIX.

Primò etenim Regalia inferioribus acquiruntur per priuilegium seu concessionem Imperatoris.

CCX.

Cæterùm Imperator non nisi ex magna & vrgentissima causa Regalia huiusmodi aliis concedere debet.

CCXI.

Priuatís verò personis Regalia concedi planè indignum est.

CCXII.

Licet consuetudo in his plurimum possit, semperq; spectari debeat.

Necessarium est autem, cum Regalia per
summum Principem alij conceduntur, vt expres-
sè apponatur clausula, quòd concessio sit facta
motu proprio, vel ex certa scientia Principis, ali-
oqui Regalium concessio est inualida.

CCXIII.

Vbicunq; enim in concessione Regalium
omittitur illa clausula, præsumitur concessio ad
postulationem partis, & per subreptionem im-
petrata, ideoq; non valet.

CCXV.

Sed etsi reperiantur expressè additæ hæ
clausulæ, tamen Regalium concessio non valet,
vel saltem reuocari potest, si ex ea Imperium seu
Regnum pateretur magnam læsione, m

CCXVI.

Sicut non valet etiam concessio Regalium
facta per Imperatorē priuatis personis, vltra vitā
concedentis, non enim potest ipse Successori suo
præiudicare.

CCXVII.

Hoc autem omnino ignorandum non est,
quod is qui Regalia sibi à sūmo Principe cōcessa
habet, non potest ea vel vnū ex illis alteri cedere.

Alter

CCXVIII.

Altermodus acquirendi Regalia inducitur
ex præscriptione temporis immemorialis.

CCXIX.

Tanti enim temporis præscriptio habet vim
tituli, priuilegij, & concessionis factæ à summo
Principe ex certa scientia.

CCXX.

Ideoq; in hac præscriptione scientiam sum-
mi Principis allegare aut probare, minimè est ne-
cessarium.

CCXXI.

Nunquam verò vno aut altero ex Regali-
bus præscriptione acquisito, in vniuersum om-
nium Regalium Ius & exercitium competit,
sed illa tantùm præscribens vsurpare potest, quæ
præscripta sunt.

CCXXII.

Quemadmodum & aliquibus Regalibus
nominatim concessis, illa tantùm competunt, quæ
concessa sunt, cætera verò minimè.

CCXXIII.

Tantum enim dici solet concessum, quan-
tum expressum, & tantum dicitur præscriptum,
quantum possessum.

CCXXIII.

Si quis tamen bona fide ac debito tempore
plura

ercendi omnia, si & quoties sese offerret occasio,
tunc putamus talem vniuersum lus omnium Re-
galium præscripsisse, licet singula specialiter per se
vsurpata probare non possit.



CAP. III.

*DE VARIIS CONCESSIONI-
bus, quæ à summo Principe fiunt sub varia
verborum figura, deq; earundem concessio-
num interpretationibus, Et quando &
quæ Regalia sub singulis conces-
sa videantur?*

CCXXV.



QVONIAM VERO IN
concessionibus & infeudationibus
Principatum, Comitatum, Baro-
niarum, Castrorum, aliorumq; Dominiorum,
varia sæpe verba vsurpantur, idèò ad formam
concessionis & singula eius verba, diligentissimè
est animaduertendum, vt intelligatur, quid &
quantum concessum sit, & an & quatenus in con-
cessione illa comprehendantur Regalia, vel non.

Qua

CCXXVI.

Qua in re illud initio pro Regula constituendum arbitramur, quod in concessione quantumcunq; generali, nunquam veniunt aut concessa videntur Regalia, nisi specialiter sint expressa.

CCXXVII.

Hocq; procedit, etiamsi additum reperitur, concessionem esse factam cummero & mixto imperio, ac omnimoda iurisdictione, Nam hec omnimoda iurisdictione non comprehendit Regalia summo Principi reservata.

CCXXVIII.

Quinimò etsi dixerit Imperator, se concedere castrum cum omnibus pertinentiis, omni- que Iure, quod ipse in eo habuit, adhuc tamen Regalia non videbuntur concessa, licet Imperator, in tali castro, Regalium Ius habuerit.

CCXXIX.

Indeq; inferitur, quod Dominus aut Baro, cui tam ampla concessio facta est, non possit tamen noua vectigalia instituere.

CCXXX.

Sanè ubi tam generalis & ampla concessio facta est, tunc vectigalia quæ prius in loco, illo

non amplius censentur de Regalibus referuatis,
sed esse cœperunt de Iuribus , pertinentiis , &
prouentibus castri concessi.

CCXXXI.

Similiter si qua sunt , quæ aliis quoq; cum
eodem castro prius concedi sunt solita , dicimus
illa comprehendere in huiusmodi amplissima con-
cessione , licet de eis specialiter non sit facta
mentio.

CCXXXII.

Et maximè hoc procedere arbitramur , si
concedens se referat ad consuetudinem in simi-
libus obseruatam , vel ad concessiones priores,
aut ad eum modum,quo tenuit,possedit,& vsus
est is, qui antea tale castrum habuerat.

CCXXXIII.

Quod si Imperator in concessione alicuius
castri vel dominiij , quædam Regalia specificè
expresserit,ad illa sola concessionem restringen-
dam esse censemus.

CCXXXIIII.

Similia verò. expressis , in tali concessione
non venire arbitramur.

At

CCXXXV.

At ubi Imperator generaliter alicui concessit Regalia summo Principi reseruata, tunc ista concessio regulariter porrigitur ad omnia quæ Principis personæ coherent.

CCXXXVI.

Tuncq; Comes, Baro, vel ij, quibus talis concessio facta est, possunt in comitatu, dominioq; ipsorum facere omnia, quæ potest Imperator aut Rex in Imperio vel Regno suo.

CCXXXVII.

Præsertim verò id obtinere censemus, ubi post quædam Regalia expressè specificata, in concessione subiecta est clausula generalis, tunc enim sine dubio veniunt omnia, etiam si sit maior ratio in vno, quàm in alio.

CCXXXVIII.

Multoque magis id dici debet, cum post quædam Regalia expressâ, concedens addidit clausulam vniuersalem.

CCXXXIX.

Versaq; vice, si Imperator concedens castrum in forma amplissima, quædam Regalia nominatim receperit, existimamus, eum reliqua omnia, præter excepta, concedere voluisse.

Generalis tamen illa, vel etiam specialis
/ Regalium concessio, semper restringitur, vt so-
lùm intelligatur valere in dominio illo, quod im-
mediatè ab Imperio dependet.

CCXLI.

Nam si quis castrum aut dominium ali-
quod habeat, alteri Domino, puta Electori, Du-
ci, aut Principi alicui subiectum, ratione superio-
ritatis & Regalium ipsi Electori, Duci, vel Prin-
cipi prius in eo competentium, tunc Regalium cō-
cessio in tali castro vel dominio nihil operatur.

CCXLII.

Præterea quantumcunq; generalis aut vni-
uersalis omnium Regalium per Imperatorem fa-
cta sit concessio, nunquam tamen Imperator à se
abdicasse censetur supremam iurisdictionem,
quam habet vt Imperator.

CCXLIII.

Huius enim supremæ potestatis nemo in-
ferior est capax, sed illa inseparabiliter cohaeret
personæ summi Principis.

CCXLIII.

Vnde inferimus, quod si Imperio immi-
neat aliqua noua necessitas vrgens, ob quam ex-
traordinariam collationem vel superindictum
institui oporteat, tunc Imperator huiusmodi
colla-

collationem vel superindictum exigere possit,
non tantum ab immediatis Imperio subiectis,
sed etiam ab iis hominibus, qui subsunt castro vel
dominio, in quo alius merum & mixtum Impe-
rium cum omnimoda iurisdictione, & omnibus
Regalibus habet, & sic à subditis quoq; mediatis.

CCXLV.

A superueniente enim noua causa, non
eximitur quis per immunitatem sibi concessam,

CCXLVI.

Vel potest Imperator superindictum im-
ponere ipsis Principibus, Comitibus, Baronibus,
& aliis Dominis, vt ipsi à suis subditis hoc exi-
gant, & Imperatori tradant.

CCXLVII.

Similiter etsi quis omnium Regalium Iura
præscriptione acquisuerit, tamen aduersus su-
premam iurisdictionem Imperatoris nihil ei pro-
dest talis præscriptio.

CCXLVIII.

Denique generalis Regalium concessio
semper intelligi solet, de Regalibus exerceri so-
litis tempore concessionis, quatenus nimirum il-
la tendere solent ad grauamen subditorum vel
aliorum.

CCXLIX.

Noua igitur vectigalia talis Dominus in-
stituere

uo sibi concessa sit licentia, Sicq; seruari videmus
in Praxi.

CCL.


Aliis concessionum formulis examinandis
hâc superfedemus. Si enim singulas persequi
voluissemus, in infinitum excreuisset disputatio.
Prudens autem Lector, vbi concessio aliqua of-
feretur, perpendendo circumstantias persona-
rum, rerum, locorum, verborum, & aliorum, quæ
in considerationem venire possunt, quid conce-
dens senserit, quæq; Regalia concedere aut non
concedere voluerit, pro suo iudicio æstimabit,

L A V S D E O.


*Ista Theses quas defendet Generosus
Dominus Ferdinandus Khuen
Baro, &c. vtiliter procudi pos-
sunt, pro Studiosis Iurispru-
dentia.*

Sic testor BARTHOLOMÆVS VI-
SCHERVS SS. Theologiæ Do-
ctor, Regens Collegij Georgiani,
& Decanus Facultatis Theolo-
giæ Ingolstadij.

CAR.



C A R M E N,




ILLVSTRI AC GE-

NEROSO DOMINO, D. FERDI-
NANDO KHVEN ABELASI, IN LIECH-
tenberg & Gartenau, Libero Baroni in


Nouo Lempach, obseruantiaë & gra-
tulâtionis ergo scriptum:

A



BVRCKHARDO VVIMPHE-

ling L L. Studioſo.



NSITVS est animis Genëroſis inclytus ardor,
Nobile quo nomen rectũ ſuper athera quõdam,
Et decus inſigni partum virtute parentum, &
Gloria quam peperit, celebrẽ poſt ſecula ſamam,
Deniq; diſparſa ſatum præconia laudis,
Conſervant, tituliſq; nouis & honoribus augent.
Hic amor (admirans reſero) tot adire labores,
Inſignes pietate viros tot voluere caſus,
Impulit, incurſus fortuna & ferre potentis,
Impete qua iuuenes vehementi concutit, alta
Quum tentare volunt, ſamamq; extendere factis.
Hos inter iuuenes longẽ ſupereminet vnus

Doſi-

*Qui titulis sublime genus, qui stemmate clarum,
Nobile praeclarè gestis (quæ sparsa per orbem
Postera proueniens, olim mirabitur atas)
Et virtute refert annofo nomen ab æuo,
Illustris splendore Baro Ferdinandus, auorum
Antiqua gaudens, qui nobilitate triumphat.*

*Ardua laus sedenim, gentis clarere vetusta
Dotibus, & longo censere à sanguine stirpem,
Et lustrare velut speculis luculenter ab altis
Semper honorandum decus & sublime trophaum
Maiorum, & dignos mirari laude triumphos:
Amplior at propria titulos virtute parare.*


*Quare KHVENIADI splendor superaddite genti,
O FERDINANDE quibus cælo te laudibus æquem?
Quæ tibi digna canam vates encomia laudis?
Namq; perillustri, quanquam sis sanguine cretus,
Nomine non tamen es celebri contentus auorum:
Niteris at propriis animum virtutibus altum
Exornare tuum, studiisq; requirere summa
Præmia perpetua laudis, verumq; decorem.
Et gracilis cum iam faciem vestiuerat atas,
Immortale decus tenerò sub pectore versans
Dulce foves celebres solidis amplexibus artes.
Scilicet arrident, vera virtutis honores,
Sicelides Musæ gremio quos vberè gignunt:
Ergò puer duro assuetus, patiensq; laboris
Pergis inaccessa, bifidi te credere rupi
Iuris, & Astrea studio colis alta frequenti
Limina diuina (Iuueni non dedecus illud)
Viribus; interea multum quoq; corpore passus*

Duno

*Dum tulit infracta prae duros mente labores,
Purpureos inter Soles & cornua Luna
Noctiuaga: exhaustum donec repleueris orbem
Torrida iam quinis, maturè frugibus aëtas.*

*Ne tamen illustrem generis splendore Baronem
Artibus in teneris consumpta industria fallat,
Irritus aut labor in somnis labetur in auras:
Et bene suscepti merces tibi iusta laboris
(Inclite) soluetur tandem par fortibus ausis.
Ardua quàm tua laus totum vulgata per orbem
Sera feres tibi viuacem post secula famam.*

*Quare age, quod tentas Iuris certamen inire,
Perge modò excellens, da vela vocantibus Euris,
Æmula cùm virtus stimulis impellat honestis:
Præmia nam læto victori debita cedent,
Iuris ubi pugnam cum laude peregeris acrem,*



A L I V D,

AD EVNDEM ILLVSTREM
ac Generosum Dominum, D. Ferdinandum
Khuen à Belasi, in Liechtenberg & Gartenau,
Liberum Baronem in Nouo
Lempach, &c.

Hæmeritò tanti haud aboleſcet gratia facti,
Summe DEVS, qui me tanto dignatus amore es,
Vt mihi quem Genitor virtutibus inclitus Heros,
Siue fide, seu iam non segnem expertus in arte,

K


Adiunxit

Adiunxit quoniam iuvet me studio atq; labore:
Militiam Phœbi ut posset studio atq; labore:
Nunc tandem specimen magna coram indole dignum
Det iuuenis, pergatq; virum volitare per ora:
Et quid enim maius, quam natum gente suprema,
Tum quando sanis tota Mars impius orbe,
Vi patriam & bello caram defendere posse.
Dehinc etiam quando posito certamine Reges,
Inter se dexteras coniungunt pace sequestra,
Consiliisq; iuvare bonos, decernere penas
Sontibus, & placida populos in pace tueri.

Ergo felices illi, vereq; beati,
Qui tunc prima genas vestit dum flore iuventas,
Heroum quamvis genus alto à sanguine ducant;
Non Præceptorum monitis parere recusant:
Sed magis atq; magis gaudent proferre per artes
Ingenium, vitæ & totiusvertere in usum:
His sed enim ipse DEVS vera dat pace potiri
In terris, clarumq; simul nomenq; genusq;
Pòst verò in cælo meritis dat præmia sponte
Pro magno ingenio, variisq; laboribus actis.

O FERDINANDE igitur mea cura & magna voluptas,
Perge age, quandoquidem cunctis sic altior ibis
In solita virtute animi, pietate fideq;
Imò etiam surget passim tua gloria in altum,
Insignes fama ante alios, & honoribus auctis
Qui tempus studiis nullum impendere sacratis.

Georgius Dornier L.L. Studiosus
eiusdemq; Generosi Dñi Ferdi-
nandi Khuen Baronis Præceptor.
ALL




A L I V D,
AD EVNDEM ILLVSTREM
VERE QVE GENEROSVM DOMINVM, D.
FERDINANDVM Khuen, Liberum
Baronem, &c.

Plchrum est Heroem, postquam illum feceris at as
lam matura virum, presenti numine Diuūm
Consilia, infandosq; ausus, qui bella minantur
Frangere, ne patria Gentes Regesq; superbi
Vi nocuisse queant, si qui nocuisse laborant.
Pulchrius at multò est, mox à puerilibus annis,
Heroum soboles si des simul otia Musis,
Vi quando frigent effata in corpore vires,
Et iam sanguis hebet gelidus tardante senecta,
Consiliis tamen imperium defendere possis.

O FERDINANDE igitur magnum decus additi Iuri,
In te multorum spes inclinata recumbit:
Nam potis es, Generose Baro, dare Iura per orbem,
Et potis es bello nigris conspectus in armis
Virbeisq; & populos & regna paterna tucri.
Quandoquidem à teneris fuerit sententia mentis
Prima tua, ut possis sacratas noscere leges,
Virtute egregia ne sis indignus auiorum.
Nec frustra, quoniam casus mens prouida ad omnes
Cum tibi sit, responsa viris das ore peritis
De Legum sensu, generoso sanguine cretus,
Subduce NICOLEO, quo non praestantior alter,

*Vi meritis auspiciis tibi deditus ordo potentium
Ipse tuis fauceat, nec non grate tur honores
Promeritos. sed nunc cecini qua carmina latus,
Vt nostrum inter nos quondam testentur amorem
Suscipe, quod superest, Dystanta incepta secundent.*

Iodocus Brumius Hildesia-
nus Saxo.



ACCLAMATIO HEROICA,

AD EVNDEM ILLVSTREM
AC VERE GENEROSVM DOMINVM,
D. FERDINANDVM Khucn à Belasi, in Liechtenberg
& Gartenau, Liberum Baronem in Nouo
Lempach, &c. scripta:

AVTORE

M. IACOBO FISCHERO PONTIFICIO
& Cæsareo Poëta Laureato, &c.



*On equidem, te KVNIADÉ, memorande silebo,
Qui mox audito Musarum nomine quondam,
Deseris & muros & pulchras deseris arces,
Quate nutrierant patriæ, cariâ, parentis,
Præcipitasq; moras omnes, tibi gloria facti
Insignis cordi est, subita spe feruidus ardes,
Ob studia & linguas varias inuisere terras;
Nec tua postmutata loco sententia cessit.
Urbs iacet in latis Borûm celeberrima campis,
Semper ubi ingenua vixerunt hæc ænæ artes,*

Et

Et quæ Teutonidum bello est notissima mundo,
ANGLIPOLIS, fluvius quam præterlabitur Ister:
Huc, dum prima novis adoleret moribus ætas,
Tendere cura fuit, pulchra ut virtutis alumnus,
Inveniat tandem votis quod sæpe petiuit,
Nempe illi ut cedat victoria parva labore,
Et remeet patriam Victor Generosus ad urbem:
Imò etiam ad Superos, quorum percussus amore est,
Succedat fama, vivusq; per ora feratur
Docta virum; nec spes FERDINANDVS pascit inanes:
Nam licet hic ætatos & aetorum antiqua sonare
Nomina multa queat, voluit tamen arte magistra,
Quod pauci faciunt quibus est ea stirpis origo;
Discere Iustitiam, sine qua non gloria rebus
Vlla potest quari, casus quicumq; sequatur.

O FERDINANDE igitur te non felicior ullus,
Est omnes inter generoso sanguine cretos,
Quandoquidem vestram si prima ab origine gentem
Enumerare velim, vasto ruet Oceano nox.
Quare ut summa sequar breviter fastigia rerum,
Annon iam pridem cæli usq; ad sidera notus
Est Avus, in terris quem regia curia, multo
Tempore, FERDINANDI coluit, sobolesq; magistrum?
An non supra homines Patrum pietate videmus,
Insula cui sacra circumdat tempora vitta,
Iretuum, Princeps nostri est qui maximus orbis?
Et Patris ignorat, quis fratrem deinde RODVLPHVM,
Quem rapuit nuper dura inclementia mortis,
Et qui consiliis in magni Caesaris aula
Regna tot & populos iuvit, Mauortius Heros?
Ante alios verò cælo queis laudibus æquem,

Lang, tibi pater est, decus in ætæ colle stirpis
 KVNIADVM, quem cura manet fulcire labantis
 Religionis opus, sanctæq; per oppida leges
 Servare, & vulgus composita pace tueri
 Infirmi quoniam fratris sunt corporis artus.
 Et Mater, genuit multa quam prole beatus,
 FRANCISCVS, THANHAVSIADÆ lux inclita Gentis:
 Sex Gnatos sedenim dederat fortuna parenti,
 CHRISTOPHORVM, qui primus erat, cui viuida bello
 Dextra fuit, cui animusq; ferox, patiensq; pericli.
 Hunc sequitur magnus virtute GEORGIVS Heros,
 Exultans, dum vita fuit, fulgentibus armis.
 Nec tu BARTHOLOMÆE meis indictis abibis
 Carminibus, sacros Canones, & vota sequentem
 Ritè Salisburgi, dum fata Deusq; sinebant.
 Sed ne VVOLEGANGVM taceam, fratremq; IACOBVM,
 Pocula libato summo tenus attigit ore
 FERD'NANDI prior ille Ducis patrisq; Tyrolis,
 Magnanimi verò FERD'NANDI Caesaris alter.
 At nunc quid PAVLVM memorem, quem regia cæli
 Linqvit adhuc nobis, vinumq; Carinthia solum
 E numero fratrum cernit, quos ferreus urget
 Somnus, & in longam clausurunt lumina noctem.
 Ex hac, FERD'NANDE, est Genitrix tua stirpe creata
 ELISABETHA, patri dulcis medicina laborum,
 Virtute exuperans muliebri, & laude pudoris.
 Quod superest magnum Iuris decus atq; Lycæi,
 O Generose Baro, Boias qui innisit Athenas
 Laudabis meritis tua facta insignia, qua nunc
 Aggrederis, magna Legum stipantecaterua,

Præside